

Presentau il Tschespet 62 a Lumbrein

Vic Hendry ed in engrazieivel auditori

(gc) Era tier la Romania eisi daventau ils davos onns usit da presentar sias ediziuns. Quei dat era caschun da s'entupar mintgamai cugl autur e sia ovra. Tschella sera ei la sala el restaurant Péz Regina a Lumbrein s'emplenida sil davos plaz. Tgei satisfacziun per l'organisatura ed oravontut per igl autur dil Tschespet 62 «Cun l'auter a pèr» – ina autobiografia – da Vic Hendry, Tujetsch/Schaffusa. Propi gudend ed engrazieivlamein han ins tedlau igl enconuschent scribent ed intervegnu enqual interessant detagl.

Beinvegni cordial

Il Chor viril da Lumbrein, dirigius da scolast Gion Martin Cabalzar, ha buca schau per la breigia da far beinvegni cun zacontas bialas canzuns. Igl applaus ei staus meritaus. Sco reconuschientscha ha il collaboratur regional dalla Romania, Carli Scherrer, gest dedicau al Chor viril numnau ina canzun, cumponida da cuort dad el, secund in text «Viadi» da Tresa Rùthers-Seeli. Ins vegn a saver bien grau per quei schenghetg unic.

Il parsura dalla Romania, Gion T. Deplazes, Sagogn/Domat, ei veseivlamein satisfatgs che la sera litterara a Lumbrein catta in tal eco positiv. El engrazia agl autur dil Tschespet: Vic Hendry, che ha scret ton pil pievel romontsch. Reconuschientscha drezza el era al versau redatur da quella publicaziun romaniana: scolast Silvio Camenisch, Domat, agl illustratur dalla cuviarta: Fortunat Cagienard, Trun/Wangs, al collaboratur Carli Scherrer e consorta per l'organisaziun sco era alla Stampa Romontscha ed en special a Marius Hublard per l'oreifra execuziun e formaziun grafica dil Tschespet.

Interessanta introducziun – fascinonta prelecziun

Il redatur dil Tschespet, Silvio Camenisch, introducescha, sebasond sin ina tschecca corrispundenza ch'el ha giu cugl autur en connex cun quella ediziun. El paleisa detagls autentics zun interessants, laschond passar revista la reha prestaziun litterara dil scribent tuatschin. Il Tschespet 62 ensiara la biografia da Vic Hendry, che trai ina bilanza da sia veta. Dabia reviva ella retrospectiva. Igl ei vegniu ina cronica voluminusa cun 75 tetels che «sestendan» dalla «Nanna» alla «Biua» – naven dall'affonza, ils onns da studi, la famiglia, digl exodus tochen ad ina retscha d'omagis a tons ch'ei i cugl autur – che ha cumplenu igl onn vargau ils 70 – in tschancun pli cuort u pli liung a pèr.

Vic Hendry ei grondamein impressiunaus dil retscheviment simpatic e digl udiu. En siu cudisch relati el da quei ch'el hagi fatg atras. Ed el prelegia zacons «capetels» che lain reviver da quei che beinenqual dils presents ha era experimentau. Ei regia perquei atenziun cumpleina, mo interrutta, mintgaton d'in resun affirmont ni d'in capeivel surrir. Vic Hendry ei in meister da preleger. Mintga «historia» plaida per sesezza. Ils commentaris accumpignonts ein cuorts, suverans, slucconts, savens cun ina presa humor e tucan sil viv. Ins vul mo tedlar igl autur. Leger l'ovra da Vic Hendry – ni udir el sez a prelegend – quei ein duas caussas.

Vic Hendry dat bugen caschun da far damondas. Quellas pertucan pil pli siu stil e lungatg unic. Ins ei denton cuntents cun las rispostas che seculmineschau ella constataziun: «Jeu vi buca scriver auter». Endretg aschia! Ver in aschi engrazieivel ed interessau publicum sco a Lumbrein sto esser ver balsam per in scribent. Reconuschientscha veseivla ed udibla ed el medem mument era stimulaziun e motivaziun da continuar. E mintgaton drova scadin – e buca il davos era in scribent romontsch – da quellas uras consoleivlas. E per Vic Hendry sperein nus bugen ch'ellas seigien aunc detg numerusas.

GR 19-03-1991